



Da Breil tanscha l'egliada sur l'entira Cadi. (Carta postala enturn il 1930).



Sguard nà da Sursaisa sin il territori da la vischnanca da Breil.

Breil – emprima staziun dal LIR en la Cadi

■ **La Cadi (dal term «Casa Dei» che sa referescha a la claustra da Mustér) giachsa sisum la Surselva al cunfin dals chantuns Tessin, Uri e Glaruna. La preschentaziun dad oz porscha infurmezziuns generalas davart quest circuit e fa staziun en la vischnanca da Breil che cumpiglia ils vitgs da Breil, Dardin e Danis-Tavanasa.**

Cadi

Anteriu territori suveran da l'abazia da Mustér (Casa Dei), sorti il 765 dal domini curretic tras la donaziun fixada en il Testament da Tello, uvestg da Cuir. 1371 *Lacadey*. La Sursassiala (sur la Val Russein) cun ils vischinadis da Mustér, Medel/Lucmagn e Tujetsch furmava il center da la Cadi, a la Sutsassiala (sut la Val Russein) appartegnevan Sumvitg, Trun e Breil. L'aula da s. Pieder a l'ost da Tavanasa furmava dapi il 1185 il cunfin oriental da la Cadi. Il 1213 è documentada regaglia ed il privilegi da dieschmas, concedi a la prinzi-abazia da Mustér. Il 1285 è la Cadi sa preschentada per l'emprima giada cun in agen sigil. Il 1371 è menziunà l'emprim mastral (per propi) da la Cadi. Il 1401 è il cumin s'acquistà l'avugadia sur la claustra da Mustér. En il temp medieval avevan ils Libers exteriurs da Lags, domiciliads en la Sutsassiala, lur atgna dretgira che sa radu-

nava a Saissafratg/Castrisch. A l'entschatta dal 16avel tschientaner èn ils blers dad els s'acquistads il dretg da burgais da la Cadi.

Fin il 1851 è la Cadi stada dividida en quatter curts administrativas u dretgiras civilas cun mintgamai in agen stater: Mustér, Tujetsch, Breil/Medel e Trun/Sumvitg. Ils represchentants dals vischinadis furmavan il magistrat da cumin (14 commembers presidiads dal mastral) e la dretgira criminala (40 commembers). En dumondas politicas decideva il cumin che tscherniva il mastral dapi il 1472 dad ina proposta da trais preschentada da l'avat, dapi l'entschatta dal 17avel tschientaner d'ina candidatura libra. Tranter il 1742 ed il 1750 èn questas tschernas succedidas mintg'onn, dapi il 1751 mintga dus onns, e quai il glindesdi da Tschuncaisma. Tranter il 1738 ed il 1745 èn las vischnancas sa liberadas da las dieschmas claustrals. Il 1799 respectivamain 1803 ha la Cadi pers il status d'in territori suveran claustral, il cumin da la Cadi è dentant sa mantegnì fin il 1851. La Cadi aveva duas vuschs a la dieta da la Lia Grischa e dapi il 1803 dus fin tschintg represchentants en il Cussegl grond dal chantun Grischa. Il 1851 è l'antierura enclava da Schlans vegnida incorporada sco settavla vischnanca en il nov circuit da Mustér respectivamain en il nov

district dal Rain Anteriu (district Surselva dapi il 2001). Il 1854 èn las quatter curts surmenziunadas vegnidas integradas en las ulteriuras sis vischnancas politicas anc oz existentas.

Adolf Collenberg

Sassiala

Territori che s'extendia al vest (Sursassiala) ed a l'ost (Sutsassiala) da la chavorgia da Russein. I sa tracta d'in anteriu territori d'immunitad da la claustra da Mustér. Il term Sassiala deriva dal latin *saxum*, rumantsch grip, crap. La Sursassiala cumpiglia las vischnancas da Mustér, Medel e Tujetsch ed è vegnida urbanisada durant il temp medieval tempriv sut l'influenza da la claustra da Mustér. Il sistem da curts predominava. La Sutsassiala cumpiglia las vischnancas da Sumvitg, Trun, Breil e (dapi il 1851) Schlans e fa part dal vegl territori cultural retic. Qua predominescha il sistem da vischnancas cumpactas. La divisiun en Sur- e Sutsassiala gioga anc a l'entschatta dal 21avel tschientaner ina rolla impurtanta en la repartiziun dals uffizis circitals.

Adolf Collenberg

Rain Anteriu

District da dretgira civila stgaffi il 1851 cun la nova organizaziun da las dretgiras grischunas. El correspundeva territorialmain a la dretgira auta resp. al cumin da la Cadi da la Veglia Republica ed al district Funtaunas dal Rain dal Chantun Rezia 1800–03. La vischnanca politica da Schlans fa part da quest district (respectivamain dal cumin da la Cadi) pir dapi il 1851. El è vegnì schlià il 2001 ed integrà en il district Surselva.

Adolf Collenberg

Breil

Vischnanca politica, circuit Mustér, district Surselva (avant il 2001 Rain Anteriu). La vischnanca cumpiglia il vitg principal da Breil, situà sin ina terrassa al nord sur la Val dal Rain Anteriu e las fracziuns da Dardin-Capeder sut il vitg e Danis-Tavanasa en il funs da la val. 765 in *Bregelo*, dapi il 1943 Breil/Brigels (uffizial). 1850 1086 abitants; 1888 848; 1900 859; 1950 1169; 2000 1187.

Breil è sa sviluppà a partir dal temp roman respectivamain dal temp medieval tempriv. Il 765 ha l'uvestg Tello da Cuir regalà a la claustra da Mustér sia curt cun chasa signurila a Breil, ensemen cun bains e subdits a Dardin, Danis, Schlans e Trun. Sin il crest da S. Eusebius sa chattan restanzas d'ina fortezza cun baselgia dal temp medieval tempriv. Marmarola a l'ost da Breil era probablmain ina migiuria da l'abazia, arsa giu il 1496 (oz ina ruina). A Breil vivevan ils uschenumnads Libers exteriurs da Lags, ina gruppa da ca. 200 persunas ch'è s'acquistada l'admissiun a la dretgira auta da la Cadi il 1536 e ch'ha obtegnì in'atgna dretgira civila il 1542. Breil furmava, ensemen cun Medel, la terza curt en la Cadi. La pestilenza ha chaschunà il 1550 316 victimas, il 1556 180 ed il 1631 130. L'onn 1738 han ils abitants cumprà ora las

dieschmas. La baselgia parochiala da S. Maria a Breil datescha probablmain dal temp medieval tempriv e vegn documentà il 1185 sco proprietad da la claustra da Mustér. Il 1491 è ella vegnida incorporada a la claustra. Fin en il 17avel tschientaner era S. Maria la baselgia principala da Dardin, Danis e Schlans. Sin territori communal da Breil sa chattavan en tut dudesch baselgias e chapluttas. La vischnanca tradiziunalmain purila tgrava stretgs contacts cun il Glaruna (sur il Pass da la Lembra); ella è stada, grazia als de Latour, in center politic da la Cadi durant il 17–19avel tschientaner. Ils tschancuns da via Breil-Vuorz (1870) e Breil-Tavanasa (1890) servivan era al turissem da stad ch'aveva cumenzà a flurir a partir dal 1850 (oravant tut turissem da cultura). Dapi il 1945 dispona la vischnanca da Breil d'ina piazza da tir per truppas da defensiu cunter aviuns, dapi il 1946 è ella in center impurtant da l'economia d'electricitad cun lais da serra e centralas a Breil ed a Tavanasa. Cun la construcziun dals implants da skis Pez d'Artgas (1972) è Breil daventà in lieu da sport d'enviern. Il 2005 lavuravan 58% da las persunas cun activitad da gudogn a Breil en il terz sector. La part da la populaziun da lingua rumantscha è sa diminuida mo pauc durant ils davos 100 onns: 1880 99% (lingua materna); 2000 80,5% / 88,7% (megra lingua / tuttas indicaziuns). Il territori da Scarlè al nordvest da Breil è dapi il 1911, la Val Frisal dapi il 1999 sut protecciun da la natura. Meglieraziun generala a Breil Vitg dapi il 2002. Il 2003 è la culegna da Cathomen (tudestg Tomahüs) vegnida vendida ed incorporada a la vischnanca da Sursaisa.

Adolf Collenberg

Dardin

Fracziun da la vischnanca politica da Breil, cun Capeder e tschintg ulteriurs aclauns, situada lung la via veglia da Schlans a Breil. L'abitadi Pugas (Arpagaus) è vegnì bandunà il 1800. 765 *Ardunae*. 2008 159 abitants. Sin il Grep Patnasa ed a Dardin chatt'ins craps-scalutta preistorics. L'onn 765 ha l'uvestg Tello regalà a la claustra da Mustér bains e colons a Dardin. Ils Libers da Lags residents a Dardin e Breil han gi fin il 1536 il dretg d'utilisar las pastgiras d'alp da Tschegn Dadens e Dado. Dapi il 1664 furma Dardin ina pravenda, deditgada a s. Bistgaun. L'agricultura predominescha. Meglieraziun generala a Dardin e Capeder iniziada il 1992.

Adolf Collenberg

Danis

Fracziun da la vischnanca politica da Breil, ensemen cun Tavanasa, Wali e fin il 2003 Cathomen, situada en il fund da la val. 2008 447 abitants (ensemen cun Tavanasa e Wali). L'onn 765 ha l'uvestg Tello regalà a la claustra da Mustér bains ad *Anives*. Per far frunt a la Refurmaziun ha l'avat Cristian de Castelberg erigì il 1581 a Danis ina chaplutta deditgada a la Sontga Trinitad. Suenten la separaziun ecclesiastica da

Breil il 1650 è sa constituida la plav da Danis-Tavanasa, pastorada da chaputschins fin il 1940. La construcziun da las Ovras electricas Frisal SA ha inizià suenter il 1970 in ferm svilup economic (oravant tut mastergnanza). Lieu da scola primara da la fracziun e center da scola superiura da l'entira vischnanca politica. Meglieraziun generala terminada a Danis-Tavanasa il 2001.

Adolf Collenberg

Tavanasa

Fracziun da la vischnanca politica da Breil, ensemen cun Danis, Wali e fin il 2003 Cathomen (cedi a Sursaisa). 2008 447 abitants (ensemen cun Danis e Wali). Situada a 800 m a la riva dretga dal Rain Anteriu. 765 *Abbatissae* (copia), 1470 *Thafanaten*. L'Ual da S. Pieder a l'ost da Tavanasa furmava dapi il 1185 il cunfin oriental da la Cadi. En il 17avel tschientaner eran domiciliadas a Tavanasa familias reformadas ch'èn ubain convertidas al catolicissem ubain emigradas suenter il 1650. Il 1890 è vegnida costruìda la via chantunala da Tavanasa a Breil, ed il 1912 ha il vitg obtegnì ina staziun da la Viafier retica. Il 1946 è Tavanasa daventà in center da distribuiziun d'electricitad: las centralas da las Ovras electricas Frisal SA, dirigidas da las Ovras electricas da la Svizra Nordorientala (dapi il 2009 Axpo), sa chattan a Mutteins, in'ulteriura centrala ed in lai da serra al vest da Tavanasa. Il 2001 è vegnida decidida la meglieraziun generala.

Adolf Collenberg

Pass da la Lembra (Kistenpass)

Passadi a 2638 m che collià Linthal/GL cun la vischnanca da Breil, tudestg Kistenpass. La Lembra ha strusch gi dapli ch'ina impurtanza regionala. In cas singular è stà il pelegrinadi da perdunanza en il Glaruna, dal qual in avdant da Glion rapporta il 1525, menziunond l'alp crappusa da Nüschen al sidost da l'alp da Baumgarten e la magnifica punt da Panten davos Tierfeld. Il Pass da la Lembra è stà impurtant oravant tut per ils da Breil che chatschavan lur muaglia sin l'Alp Lembra; tranter il 1866 ed il 2005 han els alpeggià mo anc 600–1000 nursas en la regiun dal Mutsee. Il 1799 han truppas da l'armada austriaca traversà il pass. Il 1887 ha la secziun Wintertur dal Club alpin svizzer laschà construir la chamona dal Mutsee sin 2503 m. Il conclus federal dal 1939 da realisar ina via sur la Lembra n'è mai vegnì concretisà.

Martin Bundi



Crest da S. Eusebius cun baselgia dal temp medieval tempriv. (Carta postala dal 1940).

Lexicon Istoric Retic

Il LIR cumpiglia bundant 3100 artigels (geografics, tematics, artitgels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.